

# Ихлос



11:00 / 25.07.2023 1163

Аллома Қози Байзовий роҳимаҳуллоҳ ҳақида қизиқ ривоят бор:

«Байзовий ўзининг «Анворут танзил ва асрорут таъвил» номли тафсирини ёзиб битиргач, уни султонга кўрсатиш учун Бағдоддага йўл олди. Мақсади султондан тирикчилик ва замон ташвишларига асқотадиган бирор нарса олиш эди.

Йўлда бир қишлоқда тўхтади. Шайхлардан бирининг уйида меҳмон бўлди. Шайх уни меҳмон қилди. Зиёфатдан сўнг шайх ундан сўради:

- Қаерга кетаяпсан?
- Бағдоддага!
- Нега?
- Мен бир тафсир ёздим. Кўп меҳнат қилдим. Қизларим бор. Уларнинг бўйи етиб қолган. Уларни турмушга беришим керак!

Шайх сўради:

- «Ийака наъбуду ва ийяка настаъин»ни нима деб тафсир қилдинг?
- Биз бу оятни «Сендан ўзгага ибодат қилмаймиз, Сендан ўзгадан ёрдам сўрамаймиз» деб тафсир қилдик!
- Нега унақада ўзгадан ёрдам сўрагани боряпсан?!

Шайхнинг гапи Байзовийга таъсир қилди. Бағдоддага бормади. Орқасига қайтди.

Айтишларича, унинг тафсирига ана шундан сўнг қабулият берилди. Тириклигида ҳам, вафот этганидан кейин ҳам олимлар унга мурожаат қилишди ва қилишяпти.

Унинг тафсирига уч мингдан ортиқ тафсир, ҳошия ва таълиқлар битилди.  
Жуда кўп инсон ундан фойда олди ва олмоқда!

**«Ар-риҳлатул Айёшийя» 1 жуз 249 саҳифа.**

**Абдулқодир Полвонов**

Ушбу мақола Ўзбекистон Республикаси Вазирлар Маҳкамаси ҳузуридаги  
Дин ишлари бўйича қўмитанинг 2023 йил 16 июндаги 03-07/4775-рақамли  
хуносаси асосида тайёрланди.